

الفا جومى

أنا وإمام والأستاذ هيكل
فى مجلس الأمن القومى

« على سلايم التليفزيون ضربونا وود الجونا وحمدنا
الله أن العود لم يصب بسوء.
« ناقد فتى وجه سؤال لأجهزة الأمن: كيف تغفلون
عن نجم وإمام؟
« عضو بارز فى مجلس الأمن القومى قال عنا: «إنها
صرخة جوع.. وعلينا أن نقتلها بالتخمة».

obseikan.com

أنا بيني وبينك دماغى ضرب (تانى) والغيره شعوطت صرمى رحت ماسك
الورق والقلم ونزلت لك حرت وقوام قوام خلصت أنا كمان شعارين وما حدش
أحسن من حد!

(الغربه) و(الأوله بلدى).

وراح إمام ابن العفاريت شايطهم فبقى رصيدنا أربع شعارات فى ليله واحده
بفضل جنان محمد جاد وزغاريت لبيبه بنت هاجه و.. عبقرية الشيخ إمام.

مجرد مانور الصبح شقشق نزلنا فطرنا الفول من عند فوزى العجيب، وسابنا
محمد جاد وروح وبقينا لوحدنا أنا والشيخ إمام.. وسألته:

- إنت حتنام؟

قال لى:

- لا .. وانت؟

قلت له:

- مش جاي لى نوم م الفرحة.

قال لى:

- طب هو احنا يعنى يعنى.. ما معناش اصطباحه؟

قلت له:

- ولا الوتكه.. انت إيه يا إمام.. ما بتشبعش؟

قال لى:

- يعنى انت بتشبع؟

قلت له:

- طب ماتيجي بينا تماشها افرنجي لغايه التليفزيون.. منها تنشيط ومنها نعمل
مفاجأه لعايده شكرى ونسجل لها الأربع شعارات ونيجي..



مريشة الفنان : محمد

وبعدين سألته:

- ولا انت تعبان؟

قال لي:

- دانت اللي تعبان.. أنا خرمان.

قلت له:

- على ما نروح ونيجي يكون خلق في قضاءه رحمه.. هيه؟ انت واد جامد؟

قال لي:

- أنا واد جامد قوي.. قوي جداً خالص.. ياللا بينا.

حطينا كتفنا في كتف بعض وفضلنا نتدالج لحد ما وصلنا ماسبيرو.. دخلنا ع
الأمن أنججيه وإمام معلق العود في دراعه الشمال.. صباح الخير.. ماحدث رد.. إمام
اتأخذ.. خفت ليقلل ويبوط المشوار.. قلت لبتاع الأمن:

- احنا عندنا معاد مع الأستاذه عايده شكرى.

بص لنا من فوق لتحت بمنتهى القرف وسأل إمام:

- إنت بتشتغل إيه؟

قال له:

- إنت شايف إيه؟

قال له:

- أنا شايف قدامي راجل كفيف وشايل عود.. تبقى انت يا إمه مطرب يا إمه
ملحن.

قال له:

- طب ما أنت نبيه أهه.

قال له:

- واللى معاك دا بيشتغل إيه؟

قال له:

- دا الأستاذ الشاعر أحمد فؤاد نجم.

ضحك وقال لى باستظراف:

- شاعر .. شاعر بإيه؟!!

راحوا ضاحكين وقال واحد منهم:

- شاعر بمغص.

وراحوا ضاحكين تانى.

قال لى:

- طب ماتشعر لنا شويه.

قلت له:

- أمك اسمها حنفي .. وأبوك عايش فى كنفى.

وعينك ماتشوف إلاّ النور .. أربعه شداد غلاظ بقوا يدألجونا على ساللم
التليفزيون زى براميل الزيت، وإمام متأبد فى العود سلمه يبجى فوقه وسلمه يبجى
تحتة .. لكن ستر ربك خرج العود من التجربه صاغ سليم، وسمعنا من خلال
ضحكهم صوت جهورى بيقول لنا:

- ياللا يا زباله يا ولاد الكلب .. إياك تعتب هنا تانى انت وهو.

ولقيت الناس ملمومه بتتفرج زى عاده المصريين وصوت بيقول:

- هما عملوا إيه دول؟ ..

ورد عليه صوت تانى:

- لازم كانوا جاينن يخنوا بالعافيه ..

أنا طلعت على بضحك، لكن فوجئت بالشيخ إمام متألم وحزين وحاسس
بالإهانة ودموعه نازله على خدوده.

قلت له:

- إنت زعلت؟

ماردش عليّ.

طبببت عليه وبسته وقلت له:

- جري إيه ياد يا خرع انت.. بقى شويه بقري دول يزعلوك برضه؟!!

وبعدين وحياه العيش والملح وراس سيدنا الحسين.. لو عايز تخش المخروب ده
لأدخلك من أوسع الأبواب.

المهم - العود ماجرالوش حاجه، لكن الشيخ إمام هو اللي انشرخ، وفضلت
الحكاية دي مسيطره على مزاجه فتره طويله.

عرفت بقى إيه عباره التلفزيون معانا وليه إمام هب في رجاء النقاش؟

قلت له في ودنه:

- هديّ اللعب وسيني أنصرف.

وقلت للأستاذ رجاء:

- ماتزعلش م الشيخ إمام هو أصله ما بيحبش التلفزيون لكن عشان عيونك
لازم يروح معاك.. وحيروح لوحده كمان..

قال لي:

- دا جميل جداً.

قالها وكأنه خرج من ورطه.. وتاني يوم جت عريبه خدت الشيخ إمام العصر

ورجعت الساعة عشره بالليل .. كانت السعاده طافحه على وشه .. سألته ..

- سجلتوا إيه؟

قال لي:

- سجلنا الغربه وعم السيد.

وقد حكى لنا إزاي اتلموا عليه في التلفزيون ورحبوا بيه وإزاي هو فكر يبصق على موظفين الأمن وهو خارج .. وكان سعيد جداً وهو بيحكى لي إن:

- الست شريفه فاضل قابلته بالأحضان وطلبت منه يسمعها حاجه فقعد سمعها عشق الصبايا وطارت بيها في السما وطلبتها منه عشان تغنيها فوافق فوراً على اعتبار إننا روح واحده في جسدين!!



على إثر إذاعه برنامج شريط تسجيل وضحت الرؤيه .. مجموعه المكالمات التلفزيونيه وبعدها الرسائل اللي أنهالت على مبنى التلفزيون تسأل عن مين المغني الضربير اللي ظهر في البرنامج أكدت للمعنيين أن المسأله أكبر كتير من دماغ الساده كتاب التقارير السريه اللي كان رأيهم إننا شويه حشاشين جعانيين وموتورين ونازلين شتيمه في الحكومه عمال على بطال وإن مافيش لافن ولا يحزنون، وإذا كان الأستاذ هيكل قال في اجتماع مجلس الأمن القومي - بعد كده - :

- هذه صرخه جوع، وسوف نقتلها بالتخمه.

فالأستاذ سليمان جميل - حامى حمى الفن - قال على صفحات الأهرام الغراء في مقال بعنوان - المثقفون والشيخ إمام - إن الجماعه دول قاعدين يحششوا، ومن خلال الدخان الأزرق يقولوا الكلام الفارغ ده!!

وتساءل بمراره .. أين أجهزه الاتحاد الاشتراكي وأين أجهزه أمن الدوله!!

.. المهم .. تفتحت علينا شبابيك الدنيا الواسعه .. ونجح بعض الصحفيين في الوصول إلى مجاهل حوش آدم عياناً بياناً وفي وضع النهار .. بعضهم جه للرصد والنشر والبعض الآخر جه للفرجه والدهشه .. والبعض جه لكتابه التقارير.

وارتفع معدل الدعوات الخارجيه بصوره مذهله - فبقى اللي يبجي بدري هو اللي يفوز بينا.. واتفرج يا فؤاد يا بن هانم وشوف الدنيا واغرق يا شيخ إمام في اللحوم والأسماك والطيور اللي كنت بتسمع عنها في الحواديت..

